

Gurasoek eta AABek Basauriko gazteen «sententzia politiko basatia» salatu dute

«Gazteak eta abertzaleak izatea da euren delitu bakarra», adierazi zuten atzo

Joseba Arruti / Bilbo

Gurasoak elkarrekin eta AABak Entzutegi Nazionalak Basauriko sei gazteri jarri zigorrak mintzatu ziren atzo. Haietako lauri hamazazpina urteko zigorra jarri zuten eta beste biri zortzina urtekoa Basaurin autobus bat erretzeaz akusatuta. Bi taldeon iritziz, «sententzia honek ohartarazlea izan nahi du, baina zigor politiko basatia da».

GURASOAK taldeak eta Amnistiaren Aldeko Batzordeek «sententzia politiko basatia» iritzi diote autobus bat erretzeagatik eta gidariari erredurak eragiteagatik Espainiako Entzutegi Nazionalak Basauriko sei gazteri jarritako zigorrari. «Berriro ikusi da zein den Espainiak Euskal Herriarentzako duen proiektu bakarra: euskal nazionalismoaren eta euskal demokraziaren zapalkuntza erabatekoa», esan zuten.

Zigor Orbe, Iñigo Vallejo, Javi Sadaba eta Jon Lopezi hamazazpina urteko kartzela zigorra ezarri diete, eta zortzina urte eta erdikoa Leire Etxebarria eta Maria Reyri aurrekoen konplizeak izateagatik. Gazteak prentsaurrekoan azaldu ziren atzo, Gurasoetako Pili Gil eta ABBetako Julen Larrinaga eta Jagoba Terronesekin batera.

Larrinagaren arabera, «gazte hauei kartzela zigor basatia ezarri zaie gazteak eta abertzaleak izateko delituagatik, hori izan da espainiar epaileek zigorra ezartze-



JOSU ETXEBARRIOSTE

Gurasoak eta AABetako kideak inkulpatueko lau gazterekin, Zigor Orbe mahaian (txuriz) eta bere atzean Leire Etxebarria, Maria Rei eta Iñigo Vallejo.

ko baliatu duten oinarria». AABetako kidearen esanetan, «errepresioak baditu izenak eta erantzuleak eta guk salatu egingo ditugu: Espainiako Entzutegi Nazionalako epaileak eta fiskalak eta Barne ministeriotik errepresioa diseinatzeko dutenak».

Pili Gilek «muntaiak polizial-judiziala» salatu zuen, eta Eusko Jaurlaritzari eskatu zion azal dezan «ea Mayor Oreja eta Balza jaunaren artean lortu duten akordioa gure gazteak atxilotu, Entzutegi Nazionalera bidali eta zortzi eta hamazazpi urtez kartzelaratzean datzan».

Gilek nabarmendu zuen «orain arteko antzeko prozesuetan akordioak bilatu» direla, baina Basauriko gaz-

teen kasuan «zigor ohartarazlea» ezarri nahi izan dela. Gilen arabera, «Fiskal Nagusiaren aginduei jarraituz, Fiskalen Juntaren bilera batean erabaki zen horrelako prozeduretan inolako akordiorik ez negoziatzea».

Honelako kasuetan zigorrak ezartzeko baliatutako aitorpenak «tortura eta mehatxupear» lortzen direla eta «gazte hauek euren bizitzako urterik onenak frogatu gabeko delitu baten ordainetan galduko» dituztela adierazi zuen Gilek.

Errepresioan jauzi berria Haikarentzat

Basauriko sei gazteei jarritako zigorra, «euskal gazteen

aurkako jazarpen eta errepresioan jauzi berria da» Haika gazte erakundearen iritziz. Aurrera begirako oharpen itxura ere baduela azaldu zuten, datozen hilabeteetan gazte asko epaitu behar dituztelako Entzutegian.

Euskal gazteriarri etengabe-ko «salbuespen egoera» aplikatzen diote Haikak dioenez. Gazteek Euskal Herriaren hitzaren defentsan erakutsi duten konpromisoa zigortu nahi dutela iritzi diote. Hori guztia PPren gerra estrategia-
ren barruan kokatu zuen gazte erakundeak. Horrelako jarrerak gazteen borroka indartu baino ez duela egiten azaldu zuten, eta ildo horretatik jarraituko dutela erantsi.

«Gazte konprometituen bizitza hondatu nahi dute»

ZIGOR ORBE gazteak zigortutakoen izenean egin zuen berba, eta 1996ko Basauriko San Migel jaietan ezezagun batzuek Bizkai-buseko autobus bat erre zezaten bizi izandako esperientzia azaldu zuen.

Orbek esan zuen Basaurin jazotakoa «puztu» egin zela «hedabide askoren jokabide kriminalaren xedea herri honen

askatasunarekin konprometituen dauden gazteen bizitza hondatzea delako».

Gazte basauritarren esanetan, «autobus baten erreketaz hitz egin zen eta jakin behar da eragindako kalteak 1.600.000 pezetakoak izan zirela, eta gaur egun autobus horrek funtzionatzen jarraitzen duela».

Atxilotuak izan aurretik «irainak eta

mehatxuak» jasan zituztela azaldu zuen Orbek, eta «bonbaketa mediatikoaren» ostean lau lagun atxilotu zituztela. Hiru egunez Ertzaintzaren aldetik «tratu txar fisiko eta psikologikoak» jasan ondoren bermerik gabe utzi zituen aske Bilboko Entzutegiak.

Hala ere, «jazarpenak jarraitu egin zuen» eta bi hilabete-
ren buruan berriro

atxilotu zituzten. Jasandako «tratu txar-
raren» ondorioz norbaitek «aurretiaz presatutako deklarazio bat sinatu zuen eta 15 eta 20 hilabete bitartean egin genituen kartzelan, milioi bat pezetako bermea ordainduta irten arte».

Gaztearen berbetan, «eskubide guztiak urratuta lortutako deklarazioetan oinarrituta zigortu gaituz-

te». «Irmo defenditzen ditugun ideia batzuen alde egiteagatik ezarri digute zigorra, pedera edo bortxatzaile bati ezartzen zaion baino handiagoa», esan zuen Orbek.

«Hala ere, indarkeriarik egongo ez den Euskal Herri aske baten aldeko borrokan jarraituko dugu eta ez gaituzte isilaraziko», amaitu zuen Basauriko gazteak.

laburrean

■ Xabier Beloki preso aske 17 urteren ostean

XABIER BELOKI Donostiako Intxaurrondo auzoko preso ostegun gauean geratu zen aske Alacanten. 17 urte eta erdi baino gehiago egin ditu espetxean eta 1997tik zigorraren hiru laurdenak beteta zituen. Belokik espetxetik atera eta taxian egin zuen Teruelerainoko bidea. Handik, senideei deitu eta bila joan zitzaizkion, eta atzo goizean, 06:30ean, heldu zen Intxaurrondora. Jende ugari bildu zen lehen ongietorria egiteko.

■ Txabi Etxebarrietari omenaldia egingo dio gaur Bilboko EHk

BILBOKO Euskal Herritarrok taldeak omenaldia eskainiko dio gaur Txabi Etxebarrietari, duela 32 urte Guardia Zibilak Tolosako Benta Handin hildako ETako militanteari. Ekitaldia 19:30ean hasiko da, Bilboko Alde Zaharreko Santiago plazan. Bertatik manifestazioa egingo da Unamuno plazaraino eta han ekitaldi politikoa egingo da Josu Urrutikoe-
txea legebiltzarkidearen eta Arantza Urkaregi Bilboko Udaleko EHko zinegotziaren eskutik.

■ Errepresaliatuen aldeko konpromiso eguna ospatuko dute Gorkiz

BIZKAIKO euskal errepresaliatuen senideek konpromiso eguna antolatu dute gaurko, Gorkiz. Andra Mari zelaian egun osoan zehar jai giroko ekitaldiak egingo dira errepresaliatuen eta haien senideen jarrera omentzeko. Goizez herri kirolak, dantzak eta txapelketa gastronomikoa egingo dira. Ondoren, herri bazkaria izango da eta gauean kontzertua.

■ Goreneko fiskalak Azkue presoari egotzi delitu bat irauungi dela dio

ESPAINIAKO Auzitegi Gorenak, Entzutegi Nazionalak Iñigo Azkue presoari jarri zigorraren errekursoa aztertu zuen ostegun-
nean. Entzutegiak zortzi urteko espetxe zigorra jarri zion 1986an ETako kide batzuk autoan eramatea akusatuta. Defentsak helegitea aurkeztu zuen prozesua zabaldu zenetik (1988an) Azkueri jakinarazi arte (1998an) delitu irauungi zela-eta, eta fiskalak ere hala azaldu zuen ostegun-
nean.